

# Curregì la basa per calcular las premias

Cussegl grond ha revedì la lescha correspudenta

■ **(anr/fa) Sco proponì da regenza e cumissiun predeliberanta ha il parlament grischun approvà la revisiun parziala da la lescha davart l'assicuranza da malsaus e la reducziun da las premias.**

«La basa per calcular la reducziun da las premias è actualmain d'ina vart l'entrada suttemessa a la taglia cun la consequenza che deducziuns tenor il dretg fiscal han er in'influenza directa sin il dretg da survegnir ina reducziun individuala da las premias», ha declarà *Gabriela Tomaschett-Berther* (pcd, Mustér), presidenta da la cumissiun per sanadad e fatgs socials ier a chaschun da la debatta d'entrada per la revisiun parziala da la lescha davart l'assicuranza da malsaus e la reducziun da las premias (LARP). La cumissiun aveva decidì da proponer al cussegl grond dad approvar la revisiun parziala sco proponì da la regenza. «Persunas che han il dretg da far deducziuns profitan pia dublamain, sch'ellas pon sbassar cun donaziuns facultativas e tras custs auts per la proprietad immobigliara lur entradas sut il cunfin ch'è relevant per survegnir ina reducziun da las premias», ha ella cuntinuà. Per calcular la reducziun da las premias vegnan mess a quint, ultra da las entradas, er 20 pertschient da la facultad decisiva per fixar la tariffas. «Questa reducziun da la facultad suttemessa a la taglia ha era consequenzas di-

rectas per il dretg da survegnir ina reducziun da las premias. Cun la revisiun parziala èsi pussaivel d'eliminar questas consequenzas betg giavischadas per il dretg da survegnir ina reducziun da las premias», ha ella concludì. Il parlament ha decis da tractar la LARP. Ina minoritad da la cumissiun aveva proponì da deducir ils imports libers da taglia per uf-

fants da la facultad netta che furma la basa per calcular il dretg da survegnir ina reducziun da las premias. Cun 10:89 vuschs e 3 abstenziuns da la vusch è questa proposta dentant vegnida refusada. Il parlament ha approvà cun 97:0 vuschs e 0 abstenziuns la revisiun parziala da la LARP sco proponì da la regenza e da la cumissiun predeliberanta.



**Gabriela Tomaschett-Berther, la presidenta da la cumissiun per sanadad e fatgs socials, ha preschentà la revisiun da la LARP.**